




Parlamentarionan impresiona cu Santa Rosa y su diferente funcionnan



ORANJESTAD (AAN): Normalmente no sa tuma lugar pero semper tur cu ta interesa pa haya un amplio bista di kico tur ta tarea di nos departamento di Agricultura, Cria y Pesca ta mas cu bon bini. E biaha aki ta e organo mas halto di nos consistucion cu ta miembronan di Parlamento di Aruba di bishita na Santa Rosa.

Tabata diabierna ultimo cu e

Departamento a ricibi bishita di algun parlamentario den persona di sr. Normal Roos, sr. Jeffrey Kelly, sr. Donny Rasmijn pa loke ta fraccion di AVP den Parlamento. Sr. Andin Bikker pa e fraccion di PDR y sr. Juan Ady Thijsen pa e fraccion di MEP den Parlamento y acompaña pa griffier di parlamento mr. sra Jaqueline Williams.

E Parlamentarionan a worde

ricibi pa nos directora di Departamento di Agricultura, Cria y Pesca señora Nathalie Maduro den a hiba un combersacion di introduccion na nos departamento.

E recorrido den Santa Rosa a cuminsa na e seccion di ekiponan pisa cu ta nos truck y tractornan pa asina nan por a haya un idea di kico ta e trabao di e ekiponan pisa aki.

Seccion di crianza di Porco a sigui cu un splicacion di e hefe di seccion cu ta sra, Rebecca Franken-Croes cu a splica kico ta e tipo di rasan cu tin y kico ta e tipo di crus'e nan di e diferente rasan. Despues e parlamentarionan por a mira e seccion completo di cria.

Seccion di matanan local tabata e siguiente bishita. Siguí pa un splicacion amplio di kico ta e trabao cu ta worde haci pa conserva nos matanan local y mas importante matanan cu ta den exteccion.

E recorrido den Santa Rosa a sigui pa e seccion di Cabrito y Carne nan di rasa cu ta e "machonnan" e asina yama e "Padrotnan" pa asina nan por a conoce e diferente rasa.

Tabata tin oportunidad di admira e Toro y Baca cu nos tin y tuma nota kico ta e tipo di rasa "Jersey" y su beneficiacion pa cu nos clima.

Plantacion di "Hooi" cu Santa Rosa ta haciendo pa algun aña cu nan por a mira.



Un seccion tambe cu nan ta dispone ta e seccion di apicultura caminda cu e Parlamentarionan por a haya un amplio splicacion y demostracion di nos apicultor cu ta Johnny Falconi. Asina nan por a mira e importancia di e abehanan cu nos tin na Aruba.

Sr. Facundo Franken tambe a splica un poco di nos matanan local y nan por a admira e "Hardin Local".

Un seccion cu na e momentonan aki no ta den funcion pero cu durante cu e seccion aki tabata cla nos tabata tin e oportunidad di a haci uzo y haci un plantacion di Lechuga Romano. E test aki a bay completamente bon. Nos ta papiando di e seccion di Hydroponics.

Un bishita den nos cunucu caminda cu tin diferente mata di fruta planta y tambe nan a haya un splicacion di hefe di seccion cu ta sr. Ludwig Rasmijn. Aki a elabora riba e tipo di malesanan di mata manera cu tabata tin cu a matanan citrico y con esaki a worde teni bou control via di nos departamento.

A sigui cu e recorrido pa e seccion di Crianza di Cabrito y Carne. Aki tambe e hefe di seccion kende ta señora Rebecca Franken-Croes a splica e tipo ehemplanan y kico ta e benefi-



cionan. Pa finalisa e recorrido den Santa Rosa nos a yega na "Cunucu Chabelito" cu ta nos Kinderboerderij pa asina tuma nota kico ta e function y e tipo di bestianan cu nos tin akiden.

Despues di un descanso chikito parti paden y algo referescante pa bebe e parlamentarionan sr. Donny Rasmijn di e fraccion di AVP, sr. Juan Ady Thijsen di MEP y Griffier di parlamento mr. señora Jaqueline Williams a sigui pa haci un bishita na un cunucu cu ta di sr. Enrique Werleman na Cadushi Largo pa asina mira e cunucu di plantacion di

Maishi Rabo. Sr. Enrique Werleman a duna un splicacion di su cunucu y su contratiemponan cu e tabata tin durante plantacion.

Nan ta sumamente contento cu e bishita di nos parlamento di Aruba pa asina mira e importancia di e sector primario cu ultimamente ta hayando cada bes mas acogida y nos hendenan ta birando mas conciente. Sigur danki na e rabounan cu nos departamento ta haciendo concientizando pueblo di e importancia di haci bo mesun plantacion con chikito cu e por ta pa propio cosumo.

